



Ordenanza reguladora da concesión de subvencións.

Aprobada por el Pleno de este Ayuntamiento con fecha de 1 de Abril de 2005.
Publicada en el Boletín Oficial de la Provincia nº 144, Sábado 25 de Junio de 2005.

Exposición de motivos

Unha das manifestacións máis importantes da actividade financeira do sector público canalízase a través do outorgamento de subvencións, coa finalidade principal de dar resposta ás demandas sociais e económicas das persoas, entidades ou asociacións, públicas e privadas. Desde a perspectiva económica as subvencións constitúen unha modalidade do gasto público e, polo tanto, deben someterse ás directrices da política orzamentaria, orientada na actualidade ós criterios de crecemento, desenvolvemento en tódolos sectores e estabilidade e equilibrio orzamentario.

Definido este marco xeral do equilibrio orzamentario que lles impide ás administracións públicas, en xeral, e á administración local en particular, gastar máis do recadado, faise necesario, ó abeiro da potestade regulamentaria ou de autoorganización que se lles atribúe ás entidades locais no artigo 4.1.a) da Lei 7/1985, do 2 de abril, reguladora das bases do réxime local, trasladada-los principios xerais desta política ó ámbito local.

Deste xeito para cumprir estas ideas e co obxectivo de axustarse ó disposto na Lei 38/2003, do 17 de novembro, xeral de subvencións, o Concello da Pobra de Trives aproba a presente Ordenanza reguladora da concesión de subvencións .

Artigo 1º.- Obxecto.

O obxecto desta ordenanza é establece-los principios, criterios e procedementos para a concesión de subvencións a persoas físicas ou xurídicas, entidades, asociacións ou organismos, cando os seus servizos ou actividades complementen ou suplan os atribuídos á competencia local.

Considerarase subvención calquera auxilio directo ou indirecto, valorable economicamente, que outorgue o Concello sen contraprestación aínda que suxeita ó cumprimento dun determinado obxectivo, actividade ou proxecto ou o seu obxecto sexa o fomento dunha actividade de utilidade pública ou interese social ou de promoción dunha finalidade pública.

Artigo 2º.- Previsión orzamentaria.

As subvencións concedidas conforme ó disposto na presente ordenanza outorgaranse con cargo ás partidas que, para este efecto, se fixen con carácter anual nos orzamentos municipais.

Artigo 3.- Criterios xerais.

a) As subvencións terán carácter voluntario e eventual e a súa concesión non implica obrigatoriedade por parte do Concello e non crea dereito nin establece ningún precedente para futuras concesións.

b) A Corporación poderá reducilas ou revogalas en calquera momento, agás cláusulas en contrario.

c) Non será esixible o aumento ou a revisión da axuda económica.

d) Non se autorizan cambios de destino das subvencións concedidas.

e) As actividades subvencionadas deberán realizarse antes do 31 de decembro do ano en que se conceden.

f) As subvencións outorgaranse consonte ós principios de publicidade, transparencia, concorrencia, igualdade, eficacia no cumprimento de obxectivos fixados pola administración outorgante e eficiencia na asignación e utilización dos recursos públicos.

Artigo 4º.- Peticionarios.

Ponderan solicita-las subvencións obxecto desta ordenanza calquera persoa física ou xurídica que cumpra algúns dos seguintes requisitos:

4.1. Entidades

a) Que a súa sede social radique no termo municipal da Pobra de Trives, desenvolvendo de xeito prioritario o exercicio da súa actividade neste concello. Debe estar rexistrada no Rexistro Municipal de Asociacións e debe cumprir co establecido no seu regulamento. De xeito excepcional, eximirase de cumprir este requisito ás asociacións ou entidades, que a xuízo do órgano competente, desenvolvan labores de carácter educativo, cultural ou benéfico e ás comisións de festas.



- b) Que se atopen constituídas sen ánimo de lucro.
- c) Ter xustificadas as subvencións concedidas en ocasións anteriores polo Concello.

4.2. Persoas físicas.

A título particular ou en representación particular dun grupo para iniciativas de carácter esporádico e de interese social, sen finalidade de lucro, empadroadas neste concello.

Artigo 5º.- Actividades obxecto de subvención.

Establécense os seguintes tipos de subvencións:

a) En réxime de concorrencia competitiva.

É o procedemento ordinario de concesión. Para estes efectos terá a consideración de concorrencia competitiva o procedemento mediante o cal a concesión das subvencións se realiza mediante a comparación das solicitudes presentadas, co fin de establecer unha prelación entre estas, de acordo cos criterios de valoración previamente fixados nas bases reguladoras e na convocatoria, e adxudicar co límite fixado na convocatoria dentro do crédito dispoñible, aquelas que obtivesen maior valoración en aplicación dos citados criterios.

Neste suposto a concesión correspóndelle ó órgano municipal que teña atribuída a competencia.

En ningún caso poderán outorgarse subvencións por contía superior á que se determine na convocatoria.

b) Concesión directa.

Este sistema ten carácter residual. Poderán concederse de forma directa as seguintes subvencións:

1.- As previstas nominativamente no orzamento xeral do Concello para cada exercicio. O feito de que figuren no orzamento do Concello desta forma non significa que o beneficiario teña dereito á súa percepción, senón unicamente fixa o importe máximo da subvención que pode outorgarlle o concello. En todo caso precisarase a adopción de acordo ou resolución por parte do órgano competente que estableza a contía e as condicións en que se concrete cada subvención.

2.- Aquelas nas que o seu outorgamento ou contía veña imposto á administración por unha norma de rango legal, que seguirán o procedemento de concesión que lles resulte de aplicación de acordo coa súa propia normativa.

3.- Con carácter excepcional, aqueloutras subvencións nas que se acrediten razóns de interese público, social, económico ou humanitario e outras debidamente xustificadas que dificulten a súa convocatoria pública. Este carácter excepcional será apreciado polo órgano municipal competente para a concesión da subvención mediante resolución ou acordo debidamente motivado.

Artigo 6º.- Criterios de valoración

Para a concesión das subvencións e en orde a fixa-la súa contía, valorarase a maior ou menor concorrencia, na solicitude presentada, das seguintes condicións:

a) A continuidade, estabilidade e solvencia da entidade solicitante no ámbito no que vaia desenvolverse a actividade e o programa proposto.

b) A dificultade acreditada pola entidade solicitante para acudir a outros medios de financiamento así como os medios económicos cos que conte.

c) A orixinalidade do programa ou actividade que se desenvolverá.

d) Ó número estimado de persoas que poidan ser beneficiadas coa realización do programa ou actividade.

e) A viabilidade da actividade que se desenvolverá.

f) Aqueloutras que polas peculiares características do acto ou programa que se trate, sexan apreciadas polo órgano con competencia para a resolución do expediente.

Artigo 7º.- Documentación que hai que presentar:

As solicitudes dirixiranse ó Sr. Alcalde e deberanse presentar no rexistro xeral do Concello xunto coa seguinte documentación:

a) Fotocopia do DNI da persoa que asine a solicitude.

b) Orzamento aproximado da actividade que deba ser subvencionada cunha memoria explicativa desta, obxectivos, participantes, datas e lugar de realización.

c) Declaración responsable do solicitante na que exprese o seu compromiso de aplica-lo importe da axuda ás actuacións para as que pretende a subvención e de non incorrer en ningunha das causas que impiden obte-la condición de beneficiario segundo o artigo 13.2 da Lei 38/2003, do 17 de novembro, xeral de subvencións.



Se as solicitudes non reunisen os datos esixidos ou non viñeran acompañadas da documentación sinalada, requirirase ó interesado para que no prazo de dez días, contados a partir do seguinte á recepción da petición, emende as deficiencias, advertíndolle que no caso contrario, non se terá en conta a súa solicitude de subvención por defectos de forma.

Artigo 8º.- Prazo para presentación das solicitudes.

Será o que estableza a convocatoria específica.

Nas establecidas nominalmente no orzamento xeral, a partir da súa entrada en vigor.

Artigo 9º.- Obrigas dos beneficiarios.

a) Executa-lo proxecto ou actividade subvencionada.

b) Xustificar ante o Concello o cumprimento dos requisitos e condicións así como a realización da actividade.

c) Someterse ás actuacións de comprobación que efectuará o Concello, así como ás de control financeiro que se poidan realizar.

d) Comunicarlle ó órgano concedente ou entidade colaboradora a obtención doutras subvencións ou axudas que financian a actividade subvencionada.

e) Acreditar, con anterioridade á concesión, atoparse ó corrente das obrigas tributarias, da Seguridade Social e non ter débedas pendentes coa facenda municipal.

f) Dispoñer, cando así o esixan as bases da convocatoria, dos libros, estados ou rexistros contables requiridos.

g) Conserva-los documentos xustificativos da aplicación dos fondos recibidos.

h) Adopta-las medidas de difusión do feito de que a actividade se atopa subvencionada polo Concello da Pobra de Trives.

i) Proceder ó reintegro dos fondos percibidos nos supostos de mal uso.

Artigo 10º.- Xustificación da subvención.

Os beneficiarios deberán presentar nas oficinas municipais nun prazo inferior ós tres meses, desde a finalización do programa ou actividade subvencionada, a seguinte documentación.

1.- Facturas orixinais e fotocopia destas co obxecto da súa comprobación por parte dos servizos municipais. Devolveranse posteriormente as orixinais ó peticionario. Para estes efectos as facturas deberán estar debidamente conformadas, datadas durante o ano no que se concedeu a subvención, NIF do receptor, selo da casa subministradora e sinatura. Non se admitirán como xustificación os gastos realizados para o cumprimento de fins distintos para os que se concedeu a subvención.

2.- Un exemplar do programa, cartel anunciador ou outra documentación gráfica elaborada para o desenvolvemento da actividade debendo constar neles o patrocinio do Concello da Pobra de Trives.

3.- No caso de que se xustifique un gasto inferior ó da subvención concedida, a súa contía reducirase de xeito que nunca sexa superior ós gastos xustificadas.

4.- Cando se realicen pagamentos a entidades que teñan que presenta-la declaración do IVE, a xustificación deberá vir acompañada da factura correspondente ou duplicado desta. O IVE non será obxecto de subvención cando sexa susceptible de recuperación ou compensación.

Artigo 11º.- Réxime sancionador.

No que respecta ó réxime sancionador aterase ó disposto na Lei 38/2003, do 17 de novembro, xeral de subvencións.

Disposicións adicionais

Primeira: O órgano competente para o outorgamento da subvención realizará o oportuno seguimento das actividades subvencionadas, podendo solicitar en calquera momento as explicacións ou documentación que considere oportunas.

Segunda: Será competencia da Alcaldía a interpretación e resolución das dúbidas que da presente ordenanza puideran resultar.

Terceira: A concesión das subvencións a que se refire a presente ordenanza non implicará relación contractual ningunha de carácter civil, laboral, administrativo ou de calquera outro tipo entre o Concello e a persoa ou entidade beneficiaria da subvención.



Cuarta: Quedan excluídas do ámbito de aplicación desta ordenanza as subvencións que puidera outorga-lo Concello da Pobra de Trives e tiveran o seu fundamento en convenio ou decisión específicas subscritas entre o Concello e outras administración públicas ou institucións de todo tipo. Así mesmo, non será de aplicación ás subvencións que puidera outorga-lo Concello para a execución de programas ou actividades de iniciativa municipal en materias da súa competencia, sempre que sexa conforme á legalidade o seu outorgamento.

Disposición final: A presente ordenanza reguladora da concesión de subvencións entrará en vigor e comezará a producir efectos dende o día seguinte ó da publicación do seu texto íntegro no Boletín Oficial da Provincia de Ourense e permanecerá vixente ata a súa modificación ou derogación expresas.